



Na osnovu člana 46. stav (5) Zakona o izvršavanju Budžeta Unsko-sanskog kantona za 2025. godinu („Službeni glasnik Unsko-sanskog kantona“, broj: 1/25), Programa poticaja razvoja male privrede za 2025. godinu, broj: 03-02-51-815/2025 od 25.8.2025. godine i Odluke o usvajanju Programa utroška sredstava „Subvencije preduzećima i poduzetnicima“ iz Budžeta Unsko-sanskog kantona – Ministarstva privrede za 2025. godinu, broj: 03-02-51-816/2025 od 25.8.2025. godine, Ministarstvo privrede objavljuje:

JAVNI POZIV

**za odabir korisnika sredstava po Programu poticaja razvoja male privrede za 2025. godinu
„Podrška pokretanju vlastitog biznisa – START UP“**

I. PREDMET JAVNOG POZIVA

Predmet Javnog poziva je prikupljanje prijava punoljetnih fizičkih lica koja imaju poduzetnički duh, s inovativnim i provedivim poslovnim idejama za pokretanje vlastitog biznisa, za refundiranje i sufinansiranje prihvatljivih troškova definisanih tačkom V. ovog Javnog poziva.

II. PRAVO UČEŠĆA

Pravo učešća imaju punoljetna lica sa prebivalištem na području Unsko-sanskog kantona, a koja imaju poslovnu ideju za samozapošljavanje i samostalni početak biznisa razrađenu kroz biznis plan i koja imaju namjeru registrovati firmu te da poslovna ideja (uobličena i razvijena u dostavljenom biznis planu) jeste aktivnost koja se može registrovati kao osnovna ili dodatna cjelogodišnja djelatnost prema klasifikaciji djelatnosti KD BiH 2010 u okviru proizvodne, proizvodno-uslužne i uslužne djelatnosti, **izuzev** djelatnosti koje se odnose na: proizvodnju oružja i vojne opreme, proizvodnju duhanskih proizvoda i alkoholnih pića, otvaranje kasina i drugih igara na sreću, trgovinu na veliko i malo (osim šifre djelatnosti 45.20 – Održavanje i popravak motornih vozila), finansijske djelatnosti i djelatnosti osiguranja – područje K, poslovanje nekretninama – područje L, administrativne i pomoćne uslužne djelatnosti – područje N.

III. USLOVI ZA DODJELU SREDSTAVA

Pravo na dodjelu poticajnih sredstava ostvaruju subjekti male privrede koji ispunjavaju sljedeće uslove:

- a) da imaju prebivalište na području Kantona;
- b) da su punoljetni;
- c) da su dostavili ispravno popunjen Prijavni obrazac;
- d) da su dostavili Biznis plan na propisanom obrascu;
- e) da imaju namjeru da se bave vlastitim biznisom i da su spremni registrovati firmu u svom stopostotnom vlasništvu u slučaju da budu odabrani podnosioci prijave;
- f) da do dana podnošenja prijave nisu koristili poticajna sredstva koja potiču iz Budžeta Federacije BiH, Kantona, jedinica lokalne samouprave za istu namjenu za koju se podnosi prijava;
- g) da su spremni osigurati vlastito sufinansiranje od minimalno 10% od ukupne vrijednosti projekta.

IV. SREDSTVA ZA IMPLEMENTACIJU

Sredstva za implementaciju ove mjere obezbjeđena su u Budžetu Ministarstva privrede na ekonomskom kodu 614500 FAP002 – „Subvencije preduzećima i poduzetnicima“ u ukupnom iznosu od **100.000,00 KM**.

Minimalan iznos sredstava koji se može dodijeliti **fizičkom licu** iznosi 1.000,00 KM, a maksimalan iznosi **6.000,00 KM**, s tim da se za troškove registracije (isključivo kod refundiranja troškova) dodjeljuje fiksni iznos od **500,00 KM**.

Minimalan iznos sredstava koji se može dodijeliti **pravnom licu** iznosi 2.700,00 KM, a maksimalan iznosi **10.000,00 KM**, s tim da se za troškove registracije (isključivo kod refundiranja troškova) dodjeljuje fiksni iznos od **1.500,00 KM**.

V. NAMJENA UTROŠKA SREDSTAVA I ROK ZA IMPLEMENTACIJU

Sredstva iz tačke IV. Javnog poziva namijenjena su za:

- **refundiranje prihvatljivih troškova:** troškova registracije i troškova nabavke mašina, proizvodnih linija, uređaja, opreme (uključujući zavisne troškove: transportni troškovi, troškovi špedicije, carinjenja, montaže, itd.), nabavke ili izrade digitalnih rješenja u cilju automatizacije poslovnih procesa (softver i hardver), a sve **u funkciji osnovne djelatnosti, nastalih od dana objave Javnog poziva do potpisivanja Ugovora o dodjeli sredstava**, i
- **sufinansiranje prihvatljivih troškova:**
 - a) nabavka mašina, proizvodnih linija, uređaja, opreme (uključujući zavisne troškove: transportni troškovi, troškovi špedicije, carinjenja, montaže, itd.), nabavka ili izrada digitalnih rješenja u cilju automatizacije poslovnih procesa (softver i hardver), a sve u funkciji osnovne djelatnosti,
 - b) tehničko usklađivanje kroz uvođenje modernizacije i inovacije poslovnih procesa – uvođenja sistema međunarodnih standarda kvalitete kroz odgovarajuće konsultantske usluge i edukacije za certificiranje sistema i certificiranje proizvoda (CE znaka) i stjecanje prava ili obnavljanja upotrebe: ISO, HACCP, HALAL i drugih međunarodnih standarda i
 - c) učešće na domaćim i međunarodnim sajmovima kao izlagači (troškovi zakupa sajamskog prostora, najam, uređenje i vođenje štanda, te troškovi izrade i štampanja promotivnih materijala).

Neprihvatljivi troškovi za koje se dodijeljena sredstva ne mogu koristiti su: osnivački kapital, nabavka pribora i sitnog inventara, alata (u zavisnosti od vrste djelatnosti: npr. čekić, radne kecelje, ...), nabavka kancelarijskog namještaja i materijala, nabavka kancelarijske opreme (računari – osim za djelatnost 85.53 – Djelatnosti vozačkih škola, printeri, nabavka softvera koji nije dio projekta, izrada softvera od strane zaposlenika firme, troškovi izrade web stranice), repromaterijal, police osiguranja imovine i ljudi, kupovina i iznajmljivanje objekata, zemljišta, troškovi režija i održavanja, repromaterijal, ugradnja stolarije, podizanje krovnih konstrukcija, vanjski građevinski radovi, nabavka svih motornih i priključnih vozila, kupovina objekta za najam ili prodaju, plaće i doprinosi na plaće, troškovi po osnovu Ugovora o djelu, kao i nabavka mašina, postrojenja, usluga i opreme od lica koja nisu registrovana kao poslovni subjekti i koji spadaju u kategoriju povezanih lica sa podnosiocima prijava (isti vlasnik i/ili suvlasnik pravnog lica, vlasništvo i/ili suvlasništvo bračnog druga, i/ili srodnika u prvom koljenu, i/ili lica koja žive u istom domaćinstvu ili imaju međusobno povezane ili zajedničke investicije), cesije, kompenzacije/staro za novo, krediti, revolving krediti, lizing, gotovinska plaćanja, nastavak realizacije aktivnosti na projektima koji su započeti s implementacijom prije dana objave Javnog poziva po ovom Programu (predračuni, računi i plaćanja starija od dana objave Javnog poziva) i svi ostali troškovi koji nisu u skladu sa namjenom projekta iskazanom u Prijavnom obrascu.

Bespovratna sredstva mogu se koristiti samo za one prihvatljive troškove koji su nastali u ime i za račun poslovnog subjekta u stopostotnom vlasništvu odabranog podnosioca prijave nakon objave Javnog poziva – refundacija, odnosno nakon potpisivanja Ugovora o dodjeli sredstava – sufinansiranje.

Korisnik poticajnih sredstava ima obavezu da u roku od 60 dana od dana objave Preliminarne rang liste dostavi dokaz o registraciji poslovnog subjekta koji ne može biti stariji od dana objave Javnog poziva.

Rok za implementaciju projekta je 6 mjeseci od dana potpisivanja Ugovora o dodjeli sredstava.

Mašine, postrojenja i oprema koja se nabavlja **ne može biti starija od pet godina** od dana objave Javnog poziva.

Svako korištenje odobrenih sredstava suprotno namjenama utvrđenim ovom tačkom smatrat će se nenamjenskim utroškom.

Korisnici sredstava koji zaključe Ugovor o dodjeli sredstava s Ministarstvom po predmetnoj mjeri ne mogu prestati sa radom u periodu od minimalno jedne godine od dana potpisivanja Ugovora o dodjeli sredstava, u suprotnom u obavezi su vratiti dodijeljena sredstva u cjelokupnom iznosu.

Kod prijava čiji projekat uključuje i neprihvatljive troškove navedene u Prijavnom obrascu izvršit će se umanjeње ukupne vrijednosti projekta za iznos neprihvatljivih troškova.

VI. KRITERIJI ZA IZBOR KORISNIKA

1. Vrsta djelatnosti koja se planira registrirati
2. Vlastito učešće u ukupnoj vrijednosti projekta
3. Podnosilac prijave iz ciljnih skupina (žene, mladi do 38 godina i osobe sa invaliditetom)
4. Poslovanje subjekta male privrede u jedinicama lokalne samouprave

VII. PRIJAVA PO JAVNOM POZIVU

Prijava na Javni poziv se vrši putem Prijavnog obrasca (**Aneks I**) koji se preuzima sa web stranice Vlade Kantona (www.vladausk.ba).

Uz Prijavni obrazac potrebno je dostaviti sljedeću dokumentaciju:

- a) Biznis plan – propisan i dostupan na web stranici Vlade Kantona, potpisan od strane podnosioca prijave (**Aneks II**);
- b) Potvrda o prebivalištu podnosioca prijave (original ili ovjerena kopija – ne stariji od 30 dana od dana objave Javnog poziva)
- c) Uvjerenje/Rješenje o invalidnosti ukoliko podnosilac prijave pripada navedenoj kategoriji (ovjerena kopija – ovjera ne starija od 3 mjeseca od dana objave Javnog poziva);
- d) Izjava podnosioca prijave da nisu korištena poticajna sredstva iz Budžeta Federacije BiH, Kantona, jedinica lokalne samouprave za istu namjenu za koju se podnosi prijava – propisana i dostupna na web stranici Vlade Kantona, potpisana od strane podnosioca prijave, dostupna na web stranici Vlade Kantona – (**Aneks III**);
- e) Izjava podnosioca prijave o vlastitom učešću finansijskih sredstava za realizaciju projekta (vlastito učešće u ukupnoj vrijednosti projekta iznosi minimalno 10%) – propisana i dostupna na web stranici Vlade Kantona, potpisana od podnosioca prijave (**Aneks IV**);

Potpisom na Prijavnom obrascu, podnosilac prijave čiji je projektni prijedlog odabran za finansiranje, izražava svoju saglasnost na uslove Ugovora.

Po protoku roka ostavljenog za registraciju firme (60 dana od dana objave Preliminarne rang liste) Ministarstvo će sa **odabranim podnosiocima prijave** zaključiti ugovore tek nakon što isti dostave cjelokupnu dokumentaciju potrebnu za zaključivanje ugovora o dodjeli poticajnih sredstava, koja **uključuje**:

- a) Ovjerena kopija Rješenja o registraciji poslovnog subjekta od nadležnog gradskog/općinskog organa ili Suda;
- b) Ovjerena kopija Uvjerenja o registraciji poreznog obveznika (ID broj);
- c) Ovjerena kopija Obavijesti o razvrstavanju subjekta prema djelatnosti (izdato od Zavoda za statistiku Federacije BiH);
- d) Ovjerena kopija ugovora o transakcijskom računu, zaključenog između poslovne banke i poslovnog subjekta koji je predmet prijave na Javni poziv;
- e) Ovjerena kopija obrasca JS 3100 s prijemnim pečatom Porezne uprave (prijava osiguranja odabranog podnosioca prijave zaposlenog u poslovnom subjektu, kao korisniku sredstava, koji je u njegovom stopostotnom vlasništvu);

f) **Za refundiranje:**

- Original ili ovjerena kopija računa na ime poslovnog subjekta u stopostotnom vlasništvu odabranog podnosioca prijave uz obavezni fiskalni račun (ukoliko je izdavalac računa obveznik izdavanja fiskalnog računa), ne starijeg od dana objave Javnog poziva, izdati od odgovarajućeg poslovnog subjekta koji ne spadaju u kategoriju povezanih lica sa podnosiocem prijave (isti vlasnik i/ili suvlasnik pravnog lica, vlasništvo i/ili suvlasništvo bračnog druga, i/ili srodnika u prvom koljenu, i/ili lica koja žive u istom domaćinstvu ili imaju međusobno povezane ili zajedničke investicije), kao dokaz troškova nabavke mašina, proizvodnih linija, uređaja, opreme (uključujući zavisne troškove: transportni troškovi, troškovi špedicije, carinjenja, montaže, itd.), nabavke ili izrade digitalnih rješenja u cilju automatizacije poslovnih procesa (softver i hardver), a sve u funkciji osnovne djelatnosti;
- Izvod iz banke o izvršenom plaćanju;
- fotodokumentacija nabavljenog (podrazumijeva uslikati svaku nabavljenu stavku po dostavljenim računima – **printana u boji na A4 papir** – ovjerena na poledini sa pečatom firme);

Dokumentacija koja se dostavlja za troškove refundacije ne može biti starija od dana objave Javnog poziva, niti novija od dana potpisivanja Ugovora.

g) **Za sufinansiranje:**

Original ili kopija ponude ili predračuna sa uključenom tehničkom specifikacijom troškova, izdana od odgovarajućeg poslovnog subjekta, za sve namjene utroška sredstava koje pripadaju prihvatljivim troškovima definisanim u tački V. Javnog poziva. Ponude ili predračuni sa uključenim tehničkim specifikacijama ne mogu biti od dobavljača koji spadaju u kategoriju povezanih lica sa podnosiocima prijave (isti vlasnik i/ili suvlasnik pravnog lica, vlasništvo i/ili suvlasništvo bračnog druga, i/ili srodnika u prvom koljenu, i/ili lica koja žive u istom domaćinstvu ili imaju međusobno povezane ili zajedničke investicije). **Dostavljena ponuda ili predračun za troškove sufinansiranja ne mogu biti stariji od dana objave Javnog poziva;**

Ugovor o dodjeli sredstava sa odabranim podnosiocima prijave će se zaključiti po protoku roka ostavljenog za registraciju firme (60 dana od dana objave Preliminarne rang liste), nakon što isti dostave cjelokupnu dokumentaciju potrebnu za zaključivanje ugovora o dodjeli poticajnih sredstava, a najkasnije do 30.12.2025. godine.

Kod prijava čiji projekat uključuje i neprihvatljive troškove navedene u Prijavnom obrascu izvršit će se umanjeње ukupne vrijednosti projekta za iznos neprihvatljivih troškova.

Prijave će biti odbijene kao nepotpune i neće biti predmet daljeg razmatranja ako ne sadrže kompletnu dokumentaciju koja se traži Javnim pozivom.

Podnosioci prijave mogu podnijeti samo jednu prijavu po jednoj mjeri iz ovog Programa i isti nemaju pravo apliciranja na Javni poziv ovog Ministarstva po Programu poticaja razvoja turizma za 2025. godinu. U slučaju više prijave istog podnosioca, sve prijave će biti odbačene kao neosnovane i neće biti predmet daljeg razmatranja.

VIII. OBRADA PRIJAVA I IZBOR KORISNIKA

Za razmatranje prijave po Javnom pozivu za odabir korisnika sredstava po Programu poticaja razvoja male privrede za 2025. godinu za mjeru „Podrška pokretanju vlastitog biznisa – START UP“ ministar Ministarstva privrede (u daljem tekstu: Ministar) Rješenjem imenuje Komisiju.

Komisija ima zadatak da u skladu sa kriterijima i procedurama utvrđenim Programom, Javnim pozivom i Pravilnikom o postupcima u provođenju Programa poticaja razvoja male privrede za 2025. godinu, izvrši evaluaciju i bodovanje, sačini Preliminarnu rang listu korisnika sredstava i listu subjekata male privrede čije su prijave neblagovremene, nepotpune i neosnovane, te iste dostavi Ministru. Po odobrenju Ministra, liste se objavljuju na web stranici Vlade Kantona: www.vladausk.ba.

Na objavljene liste subjekti male privrede, imaju pravo prigovora koji se podnosi Ministarstvu u pisanoj formi, u roku od osam (8) dana od dana objave istih na web stranici Vlade Kantona.

Nakon isteka roka za prigovor i nakon rješavanja po uložnim prigovorima u roku od osam (8) dana od dana isteka roka za podnošenje prigovora, Ministar donosi Konačnu rang listu korisnika sredstava sa ukupnim brojem bodova i iznosom odobrenih poticajnih sredstava, na koju Vlada Kantona daje saglasnost i ista se objavljuje na web stranici Vlade Kantona.

Po dobivanju saglasnosti od Vlade Kantona na Konačnu rang listu korisnika sredstava Ministarstvo sa korisnicima sredstava zaključuje Ugovore o dodjeli sredstava u roku posebno definisanom za ovu mjeru, naznačenom u tački VII. Javnog poziva, nakon čega će se sredstva i doznačiti na transakcijske račune korisnika.

IX. NAČIN DOSTAVLJANJA PRIJAVA

Prijave sa potrebnom dokumentacijom dostavljaju se u zatvorenoj koverti, neposredno na protokol Vlade Kantona ili preporučeno putem pošte, na adresu:

**Ministarstvo privrede Unsko-sanskog kantona, Ul. Alije Đerzeleza br. 2, 77 000 Bihać,
s naznakom**

***Prijava na Javni poziv za odabir korisnika sredstava po Programu poticaja razvoja male privrede
za 2025. godinu „Podrška pokretanju vlastitog biznisa – START UP“
„NE OTVARAJ“.***

Rok za podnošenje prijava je **30 (trideset) dana** od dana posljednje objave Javnog poziva. Neblagovremene prijave koje su dostavljene nakon isteka roka određenog Javnim pozivom, neće se uzeti u razmatranje i iste se ne vraćaju podnosiocima prijava.

X. IZVJEŠTAJ O UTROŠKU SREDSTAVA

Korisnici sredstava su dužni pravdati utrošak ukupnih sredstava (ukupna vrijednost projekta) predviđenih za realizaciju projekta, kako vlastitih, tako i dodijeljenih sredstava Ministarstva. Za sva neopravdana sredstva, Ministarstvo će pokrenuti proceduru povrata i to u iznosu koji je proporcionalan učešću sredstava Ministarstva u ukupnoj vrijednosti projekta.

U toku implementacije projekta, korisniku se daje mogućnost da izvrši nabavku roba i usluga koje spadaju u kategoriju prihvatljivih troškova definisanih tačkom V. ovog Javnog poziva. Vrijednost dodatno nabavljenih roba i usluga ne može biti veća od 20% od ukupne vrijednosti projekta definisane Ugovorom.

Rok za dostavu Izvještaja o utrošku finansijskih sredstava je **15 dana od dana isteka roka za implementaciju projekta**. Pravdanje će se vršiti sa odgovarajućom dokumentacijom koja se dostavlja ovom Ministarstvu, i to:

- a) Izvještaj o utrošku finansijskih sredstava – popunjen, potpisan i ovjeren od strane Korisnika sredstava (**ANEKS V** – „Podrška pokretanju vlastitog biznisa – START UP“);
- b) Izjavu o namjenskom utrošku sredstava ovjerenu kod nadležnog gradskog/općinskog organa ili notara (propisana i dostupna na web stranici Vlade Kantona) (**ANEKS VI** – „Podrška pokretanju vlastitog biznisa – START UP“);
- c) Računi uz obavezan fiskalni račun (ukoliko postoji zakonska obaveza za izdavanje fiskalnog računa) – original ili ovjerena kopije kod nadležnog gradskog/općinskog organa, koji su u skladu sa predračunima/ponudama dostavljenim uz prijavu na Javni poziv uključujući i zavisne troškove. **Napomena:** Račun na kojem nije jasno vidljiva svaka specifićirana stavka ili je isti prilikom sačinjavanja fotokopije prekriven fiskalnim računom neće biti priznat kao dokaz prihvatljivog troška.
- d) Izvod iz banke o realiziranom nalogu za plaćanje iz kojeg je vidljivo da je plaćanje prihvatljivih troškova izvršeno na osnovu predračuna dostavljenog pri prijavi na Javni poziv, odnosno računa dostavljenog pri pravdanju dodijeljenih sredstava;

- e) Fotodokumentacija – podrazumijeva uslikati svaku nabavljenu stavku po dostavljenim računima – **printana u boji na A4 papir** – ovjerena na poledini sa pečatom podnosioca Izvještaja);
- f) Carinska deklaracija – ovjerena kopija kod nadležnog gradskog/općinskog organa (ukoliko se radi o uvozu opreme).

Dokumentacija koja se dostavlja za pravdanje troškove refundacije ne može biti starija od dana objave Javnog poziva, niti novija od dana potpisivanja Ugovora.

Dokumentacija koja se dostavlja za pravdanje troškova sufinansiranja ne može biti starija od dana potpisivanja Ugovora o dodjeli sredstava.

Kreditna sredstva, revolving kredit, kao ni lizing, ne mogu biti prihvaćeni kao vlastito učešće korisnika sredstava za realizaciju projekta po ovom Programu

Ministarstvo zadržava pravo traženja i dodatne dokumentacije i pojašnjenja kod provjere namjenskog utroška sredstava (pismenim i usmenim putem).

Ministarstvo vrši nadzor namjenskog trošenja sredstava odobrenih korisnicima na osnovu dostavljenih Izvještaja, a po potrebi i neposrednim nadzorom kod korisnika sredstava, a na osnovu valjanih izvora verifikacije navedenih u samom Prijavnom obrascu.

Ukoliko korisnik sredstava ne dostavi Izvještaj o utrošku sredstava, Ministarstvo pokreće zakonom propisan postupak za povrat finansijskih sredstava.

XI. OSTALO

Sredstva se dodjeljuju korisnicima u skladu sa Konačnom rang listom korisnika sredstava do utroška sredstava predviđenih za implementaciju pojedinačne poticajne mjere, a nakon eventualne preraspodjele.

Sredstva se dodjeljuju u vidu državne pomoći male vrijednosti (de minimis pomoć). Državna pomoć male vrijednosti predstavlja pomoć jednom privrednom subjektu za bilo koju svrhu koja se dodjeljuje jednom ili više puta i koja ne prelazi iznos od 300.000 EUR u tri uzastopne fiskalne godine shodno odredbama Zakona o sistemu državne pomoći u Bosni i Hercegovini („Službeni glasnik BiH“ broj: 10/12 i 39/20) i Uredbe o uslovima i postupku dodjele male vrijednosti – de minimis pomoć („Službene novine Federacije BiH“ broj: 22/25)

U postupku po Javnom pozivu Ministarstvo zadržava pravo da poništi Javni poziv u bilo koje vrijeme do zaključenja ugovora, bez obaveze pismenog ili usmenog obrazloženja.

U slučaju nedostatka sredstava u Budžetu Kantona obustavlja se realizacija dodjele sredstava. Ministarstvo ne snosi troškove nastale u vezi sa prijavom na Javni poziv.

Korisnici sredstava koji po Programima poticaja razvoja male privrede za 2022., 2023. i 2024. godinu imaju obavezu povrata sredstava, imaju pravo apliciranja na Javni poziv predviđen Programom poticaja razvoja male privrede za 2025. godinu, s tim da su isti dužni izvršiti svoju obavezu do dana zatvaranja ovog Javnog poziva.

Aneksi od rednog broja I do VI su propisani i dostupni na web stranici Vlade Kantona: www.vladausk.ba.

Kao smjernice podnosiocima prijava uz ovaj Javni poziv, na web stranici Vlade Kantona objavit će se i Program poticaja razvoja male privrede za 2025. godinu. Sve dodatne informacije vezane za Javni poziv mogu se dobiti putem telefona: 037/316-038 ili putem e – maila privreda@vladausk.ba.

Broj:06-11-9484-13/25
Bihać, 25.8.2025. godine



MINISTAR

Permin Kardašević, MA/saob. i kom.